

Cuengq Roeglaej Bae

武宣县桐岭镇新龙小学六(1)班 Vangz Cinzsinh/黄晨馨

Youq ndaw sujgyaj ngoenz ndeu banhaet, gou youq ndaw ranz sij cozyez. Sawqmw, daj ndaw fuengz cienz daeuj sing duzroeg iq heuh, gou byaij haeujbae yawj, yienzlaiz dwg duzroeglaej iq dwgyaez ndeu, de cingq youq gwnz bohliiz buekmingh vad song gaiq fwed de.

Gou gipmuengz gven bakdou caeuq cueng haeuj caez bae, coemjdawz duzroeglaej iq lo. Roeglaej iq youq ndaw fwngz gou mbouj miz banhfap cak ok, cij ndaej cici siliengz dwk heuh. Gou yungh diuz maehoengz ndeu cug din de, couhcinj de mbin hwnjdaej, hix mbin mbouj ndaej sang. Gou gyaiez duzroeg, cij siengj caeuq de guhcaemz. Gou baez cuengq fwngz, roeglaej couh mbin hwnjdaej, hoeng, mbin ndaej mbouj sang, cij ndaej nyengqndang mbin coh gakciengz bae. De daengx ndang saenzdwdwd, yawj yienghceij de gig lau. Gou ngeix de gojnwngz iek luba, hix gojnwngz de aeu swheij gag caem yaep ndeu ba, gou couh cienq ndang bae aeu di haeux caeuq raemx cuengq youq ndaw dak hawj de, dajsuenq daengz haemh le caiq caeuq de guhcaemz.

Daengz banhaemh, gou bae yawj roeglaej iq, de mbouj heuh lo, dingdingh ndwn youq gizhaenx, haeux deng de vaek ndaej dauqawq cungj dwg, hoeng, mbouj raen miz maz noix. Raen gou byaij haeujbae, de youh mbin hwnjdaej, hoeng, yaep he couh doek roengzdaej lo, de doiq lwgda iq sikhaek yawj gou. Yawj da de, gou nyaenx mbouj ndaej hojlienx duz roeglaej neix, lau dwg



duzroeglaej iq neix siengj baema ranz ba; lau seizneix bohme de cingq simyou dwk caj de baema ranz ne! Seizneix gou mbouj gaem de, lij hawj haeux hawj de gwn, hoeng, de vihmaz lij lau gou ne?

Gou mizdi siengsim lo, gou daj ndawsim gyaiez duzroeglaej iq neix, gou gyaiez dingq de heuh cicicaca; gyaiez yawj de diuq hwnj diuq roengz; gyaiez aeu song fwngz gou bae bang de roi bwn...Maqmuengh de louz youq henz ndang gou buenx gou doegsaw, hoeng, seizneix de mbouj gwn mbouj ndoet, song lwgda ngoenhngwdngwd, doiq fwed roemjramj mbouj miz rengz, yienghneix guh ne de couh yaek dai lo, de hix mbouj ndaej ciengqgo hawj gou dingq lo, gou sim' in ndaej lumj deng vunz aeu mid camz nei, raemxda nyaenx mbouj ndaej couh doek lo.

Gou uetuet raemxda, song fwngz siujsim gop dawz roeglaej iq, menhmenh byaij coh yangzdaiz, muenghmuengh gwnzmbwn gij fwj deng daengngoengz doek nyumx ndaej hoengzfwgfwg, gwnzmbwn geijlai gyaundeiz ha, gou ndawsim gag haenh, fwngz dawz geuz raed diuz cag gwnz din duzroeg goengq bae, langh de mbin coh gwnzmbwn, muengh duzroeglaej iq yied mbin yied gyaie, gou gaenq ngeix gva lo: Gou cuengq roeglaej bae, hawj de caiq ndaej youq gwnzmbwn swxcaih mbin...

Mbouj, dwg roeglaej cuengq gou, hawj gou aensim gyaiez roeg riengz de itheij youq gwnzmbwn lamzsumsum mbin! (*boux lauxsae son'gyauq: Lungz Gingyi/龙庆煜*)

Baez Daih'it Youzraemx

Aen sujgyaj gou maqmuengh haujlai nanz haenx daeuj daengz lo, gou angqvauvau. Daxmeh naeuz yaek hawj gou bauq aen beizyinbanh youzraemx ndeu, hawj gou youq sujgyaj hag rox youzraemx. A! Caen roxnaeuz gyaj? Gou hag ndaej rox lwi? Gou mizdi youheiq.

Ngoenzneix banringzgvaq, daxmeh daiq gou daeuj daengz youzyungjvanj. Bouxgyaulen heuh gou vuenh ndangdaenj, liuxle gou ganjmuengz vuenh ndei ndangdaenj youzraemx, daenj ndei mauhyouzraemx caeuq gingqyouzraemx, daeuj daengz henz youzyungjiciz. "Raemx laeg dahraix! Gou mbouj deng mbaet raemx dai ba?" Yawj gij raemx sawsaw haenx gou sim couh vueng lo. Caiq yawj ndaw youzyungjiciz miz haujlai boux siujbaengzyoux iq gvaq gou cungj lienh youzraemx, gou vihmaz guh mbouj ndaej ne? Haenqrengz sup gaemz heiq ndeu, gag dajciengj, gou mbouj naemj lai, menhmenh roengz raemx bae.

Bouxgyaulen hawj gou hag mbaetheiq gonq, gou sup gaemz heiq hung ndeu gonq, liuxle ndaem roengz raemx bae mbaetheiq, bouxgyaulen lwnh gou mbaet yied nanz yied ndei, neix gou couh lienh bae lienh dauq. Doek-

laeng bouxgyaulen naeuz ca- mboujlai lo, heuh gou bomq youq henz youzyungjiciz, song din coq youq ndaw raemx, gaem song din gou, son gou sou ga, gungj gyauejhoq, fan fajdin, ngaue byaidin caeuq cengi ga. Va! Hag youzraemx aeu baenzneix lai fuengfap ha! Bouxgyaulen riu le doiq gou gangj: "Hag youzraemx mbouj ngaih baenzlai, deng haenqrengz cijndaej!" Gou haenq ngaek gyauej, laebdaeb ciuq gij fap de bae nyinhcaen lienh.

Gvaq yaep ndeu couh roengzdangz lo, gou soengz youq henz youzyungjiciz yawj doenghboux siujbaengzyoux gaenq rox youzraemx, youq ndaw raemx lumj duzbya it-yiengh angqvauvau youz bae youz dauq, dahaenz dangqmaz. Gou simsaenq coglaeng cijaeu gou gaenx lienh, itdingh hix rox youzraemx. Neix caen dwg dangz youzraemx mizyinx dangqmaz bw!

(*Cauz Lingzveih/曹凌薇*)



Mbouj Nyaenxsim

—Biubonj Daxmeh

Daxmeh dwk lailai duj ndokva rangh mbaw haeuj ndaw bingzgingq youh luenz youh raez de bae, aeu raemxyw ceh dwk, goeb fa de hwnjdaej, gwnz fa lij fung miz lab.

Ndokva ndaw bingz gyaundeiz baenzneix, mbaw de heuswdswd. Daxmeh vuenheij lai, cam gou: Mwngez gyaiez lwi? Ndeiyawj lai bw!

Gou mbouj gyaiez! Meh ha, gou mbouj gyaiez saekdi nauq.

Langhnaeuz miz vunz yienghneix dwk gou haeuj ndaw bingz bae, meh goj vuenheij lwi?

Gou mbouj gyaiez! Meh ha, gou raen mbouj ndeiyawj saekdi nauq.

Langhnaeuz miz vunz yienghneix dwk meh haeuj ndaw bingz bae, meh mbouj cak mbouj ning, mbouj gangj mbouj ndwet, goj mbouj riu nauq, gou goj mbouj ndaej bongh haeuj ndaw rungj meh bae nauq. Meh ha, gou mbouj hawj vunz yienghneix guh

bw, gou coj dub aenbingz de dek bae dahraix, hawj meh daj ndaw bingz okdaej. Couhsuenq meh ngoenzngoengz moeb gou, gou goj mbouj ngah hawj meh youq ndaw bingz nauq, meh ha!

(*Daj 《Bonjsei Sim Lwngnyez》(Veiz Gizlinz raiz)senj okdaej, Lwgfwngzmeh/卢奋长 hoiz*)